



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10 Yangia anidakangma : Tir Yimiyim tiryimiyim@aolima tir yimiyim TAPAK 7

U17 World Wrestling Championships:
Suraj Vashisht-i gold angu

External affairs minister S
Jaishankar-i Uzbekistan semdangtsü



VOL. XIX NO. 283 (ADOK 283) DIMAPUR YANGTEPNÜ (THURSDAY) CHITENI (JULY) 28, 2022 ₹ 5.00

COVID-19 Nagaland: 15 dak putet, 16 taneptsü angu

Kohima, July 27, 2022 (TYO): Nagaland nung Bodbarnü nisung 15 dak COVID-19 putet aser 16 taneptsü angu.

Tanü Kohima nung nisung 11 aser Dimapur, Mokokchung, Mon o Phek nung nisung kaka dak COVID-19 putet. Parnok züngsema nisung 35,738 dak COVID-19 putetogo.

Nagaland nung tang nisung 99 anepaludar. Parnok rongnung nisung 2 ventilator nung, 6 oxygen agidar, 41 dak shirangba yimya

terara lir saka nisung 50 dakbo shirangba yimya kecha mali.

Bodbarnü Kohima nung nisung 10, Dimapur nung 4 aser Mokokchung o Mon nung kaka taneptsü angu. Parnok züngsema taneptsü angur 33,372 kümogo.

Nagaland nung COVID-19 ajanga nisung 768 süogo aser COVID-19 puteter 1,499 tashi tanga state temi ogo.

July 26, 2022 tashi nung coronavirus vaccine indang dose 18,58,503 agütsüogo.

NMA yanglushir ang ULB elections agitsü nenshir

Kohima, July 27, 2022 (TYO): Nagaland nung Urban Local Bodies (ULBs) asema Nagaland Municipal Act 2001 yanglushiba sülen ang elections agitsü nenshia metetdaksüogo.

Nagaland Municipal Act 2001 meyanglushira Municipal aser Town council atema electoral rolls reprangshiba nung shilem magitsü ta parnoki metetdaksü.

July 22, 2022 nü Kohima nung Association of Kohima Municipal Ward Panchayat (AKMWP), All Ward Union Mokokchung Town (AWUMT) aser Dimapur Urban Council Chairmen Federation (DUCCF) külem senden ka amendang iba telemtetba agi.

Iba dak sendakba nung parnoki Chief Minister Neiphiu Rio nem memorandum ka agütsü. Indian Constitution nung Arrla 371 (A) nung kongshiba onüktem Nagaland Municipal Act (NMA) 2001 nung yanglushitsü atema parnoki ashi.

Nagaland Legislative Assembly indang Act ajanga Arrla 371 (A) nung kongshir aser ibaji magizüker. NMA 2001 aser iba sülen yanglushiba onüktem ajanga Arrla 371 (A) nung kongshigo aser memetongshira Naga nung temeten nung

timtem ajurutsü ta municipal bodies asema ashi.

"Nagaland Municipal Act 2001 aser 2006, 2007 o 2016 nung asemben tashi yanglushiba nung Arrla 371 (A) nung kongshigo. Iba jagi ULB election magidang item section, clause(s) tamasa agientsüla" ta parnokisa metetdaksü.

Onoki Nagaland sorkar dang Nagaland Municipal Act metongshiba sülen tekaratiba nung ULB elections agitsü ayongzüker, ta parnokisa ashi.

Külen, state sorkari ULB election dak sendakba senden nung AKMWP, AWUMT aser DUCCF mejaokba atema sasa bilemer, ta parnokisa metetdaksü.

Chief Minister Rio dangi züluba shidi nung AKMWP president Thejao Sekhose, AWUMT president Limanungsang aser DUCCF president Tsenthungo Nyamo nungeri sign süa lir.

Iba memorandum nung ashiba onüktem asüngdangteptsü aser ozüng amertem dang nungi shisatsü agitsü atema Chief Minister-i State Chief Secretary dangi yokogo ta osang angazüker.

Tanü nungi Naga Solidarity Walk tenzüker

Kohima, July 27, 2022 (TYO): Global Naga Forum (GNF)-i "Naga Solidarity Walk" agitsü atema sentong ajak renemogo.

Brihostibar nungi "One People, One Destiny" omen nung ajemdaker iba sentong agitsü.

Asüngnep 6:00 ako nung Lerie junction Kohima nungi iba sentong tenzüksü aser asüng aonung Maram nung anenzükba sülen Hokolbarnü Senapati district nung tembangtsü.

"Asüngnep Nagaland nungi Naga nung noklang aikati shilem agitsü aser parnoki Nagaland tsütsü Southern Angami yim 5 shi süitsü aser Manipur nungi Naga nungertem aser talisa Senapati, Ukhrul, Tamenglong o Chandel nung alirtemi adentsü. Tatema

Manipur kübok Senapati jila nung sentong tembangtsü" ta GNF convener Chuba Ozukum-i ashi.

"Onoki Naga teloktem aser India sorkar tsüngda yimjung maparen indang mejembir saka tan yabo onoki Naga nung taginüba aser temeten sayuba sentong dang agir, kechiyong Naga nung state balala nung lemdanger lir" ta Chuba Ozukum-isa ashi.

Iba ya timi jajaba sentong ka dang lir anungji shilem agir ajaki timi dang jajatsü mepishir, ta GNF-i metetdaksü.

Naga nung ya "One people and One destiny" ta asüba tangatetba nung iba sentong nung shilem agitsü mepishir, ta parnokisa ashi.

Advisor Sukhalu-i NLPT Act agientsü ayongzüker

Kohima, July 27, 2022 (TYO): Nagaland Liquor Total Prohibition (NLTP) Act agientsüla aser iba nungi aruba sen jagi Nagaland nung educational aser healthcare sectors nung amshitsüla ta School Education and SCERT Advisor, K T Sukhalu-i ashi.

Directorate of School Education nung Swachh Vidyalaya Puraskar 2021-22 State level sentong nung Sukhalu-i iba onük jemi.

Nagaland sorkar indang revenue ajanga education aser tanga social sectors renloktsü atema meperir. Anungji NLTP Act agientsüla aser iba nungi revenue bendenbaji education aser health care renlokba nung amshi junger, ta pai metetdaksü.

"Nisungtemi iba tebilembaji magizüksü saka iba ya yi ajemtsü ajungmesorba masü. Nagaland state ajungalen sema senzüdang kinük-kisang ajak nung yi talubosa angur saka itemji yi tamajung lir. Onoki iba atema asadangogo aser Nagaland nung anguba yi sample tests asüdag temeyoktep aliba bushitetogo" ta Advisor Sukhalu-isa metetdaksü.

Nagaland nung tanur aikati ozüngi memelaba mozü achir aser parnoki sunflower kanga achir, ta paisa ashi.

"Nagaland sorkar school tem tia kanga mejungi lir aser Samagra Shiksha kübok senotsü tera arubaji kaketsüla aser aliba aser takok tajung anguba school tem nem agütsü. School indang infrastructure mejungra kodaser enrollment teimba akümtsü. Talisa

BJP Nagaland state-i NDPP den teloktep pelashishia agizüker

Dimapur, July 27, 2022 (TYO): 2023 General Assembly election nung BJP-NDPP teloktep maneni alitsü lemetba pelashishia agizüker ta Bharatiya Janata Party, Nagaland State-i metetdaksüogo.

"Nagaland nung menden lemsateper (NDPP 40: BJP 20) tokteptsüba ya pelashishia agizüker aser iba atema Prime Minister Narendra Modi, Union Minister Amit Shah, National President BJP Jagat Prakash Nadda aser National

tzüngluruwa mapangbo classrooms telungi tzu senoka aiter" ta Sukhalu-isa metetdaksü.

"NLTP Act agienba sülen revenue ngura ibaji nija aser sorkar school tem nem grant-in-aid ama amshitsü akok" ta paisa shisem.

"Takok anguba school tem nem tenüngsang agütsü ajisüaka Nagaland nung yimtsüngtem aser urban areas teimba ka 'open defecation free' ta sangdongogo saka gari nung senzürtemi jana mashimashi endoker. Nagaland nung SUVs aser XUVs aika senzüba angur saka parnoki gari nungi lenmang nung jana endokba nguogo" ta Advisor Sukhalu-isa ashi.

Iba atema Puraskar indang reju den külemi school education department-i kaketsüshirtem dang merükmejutsü yimya benshitsü asoshi tesayuba agütsü, ta paisa shisem.

"Chief Minister Neiphiu Rio lenisüba kübok Nagaland sorkari akokba tashi merükmejutsü indang osang prokshir. Asenok taintemibo matong saka asenok asen chirnurtem dang yimya tajung benshitsü tesayuba agütsütetsü" ta Sukhalu-isa ayongzüker.

Nija aser sorkar school tasentem lapoktsüba aser ano nija o sorkar school tem ajungkettsüba applications agütsüba nung kaketsüshirtem metsümeshidak, tzu tajemtsü aser asadayak peria ali nung dang State Level Education Committee-i agizüksüla, ta paisa ashi.

District nung ketdangtsürtemi school semdangdang tzu aser metzümeshidak aliba reprangtsüla,

ta paisa shisem.

SVP ya school temi water, sanitation aser hygiene atema mapa tajung inyakba atema agütsü, ta Secretary to Government of Nagaland (School Education), Limawabang Jamir-ia ashi.

SVP 2021-22 state level award for overall performance nung school 17 nem sempet agütsü:

Dimapur: Primary School Kirha, K V Rangapahar Cantonment School, Livingstone Foundation HSS & GMS Veterinary Colony.

Kohima: St Mary's Cathedral HSS, Don Bosco HSS, GHSS Chiechama & Kendriya Vidyalaya Jakhama

Tuensang: St John School Tuensang Town, GMS Kuthur 'B' & J.N.V Chare

Wokha: GMS Old Ralan, GMS Pangti & Fernbrook School Wokha Town.

GMS Peren Town DC Colony, Holy Care School Hebron-II Phek aser Eastwood School Wokha.

Subcategories:

Water - St Mary's Cathedral HSS Kohima

Hand wash with soap - GMS Peren Town DC Colony, Peren

Toilets - Livingstone Foundation HSS Dimapur

Operation and Maintenance - St Paul HSS Dimapur

Behaviour change and Capacity building - Livingstone Foundation HSS Dimapur

COVID-19 preparedness & response - Fernbrook School Wokha Town.

General Secretary (Organisation), BJP BL Santhosh nung dang kanga pelar" ta BJP Nagaland State tir Temjen Imna Along-i ashi.

"Nagaland nung teloktep sorkar ajanga nübertem nem sorkar ketdangtsübaren tajung agütsüba ajanga teloktep aser menden lemsateptsü telemtetba agiogo. Chief Minister Neiphiu Rio aser Deputy Chief Minister Y. Patton nati mangdang tajung yur len aniba atema onok ajungmesor aser iba

ajanga Central leadership-i state lennirtem dak maneni tamang akar" ta pai metetdaksü.

BJP Nagaland State nung karyakarta aser karyakarni shiai iba telemtetba pelashishia agizüker aser onoki maneni teloktep tashi itdaksütsü nangzüker.

Iba telemtetba ajanga Prime Minister Narendra Modi indang alizüngtem aser maparen Nagaland nung senso shia atongtsü, ta Imna Along-isa metetdaksü.

CNTC-i Mokokchung semdanga Aor lokti tentet balala den mensem akar

Mokokchung, 27th July (TYO): Central Nagaland Tribes Council (CNTC) ketdangpurtemi 27th July, 2022 nü Mokokchung semdanga Aor tongti lokti Ao Senden-i Aor anir Watsü Mungdang, Mokokchung Town Aor Telungjem, All Ward Union Mokokchung Town, Mokokchung Town Lanur Telungjem aser osangzülurtem den telungjem shisa lemsa mensem ka Ao Senden kilem nung kaogo.

Iba mensem nung CNTC tir, T. Lanu Imchen-i jembidang, Mokokchung, Zunheboto aser Wokha district-tem ya tangar dang nungi jenjang tajung (advance) ta jembir, saka item district-tem nung tangar memenepba (backward) tesema aika lir, anungji, itemji repranga jajatsü aser lokti balala den mensem mena jajatsü iba (tour) sentong ya yangluba lir, ta metetdaksü.

CNTC ya 2012 küm tentet. Iba telok tenteter külen nungi tanü tashi arudang jurila atema kecha meinyak, saka Naga nung rangben ajungtsü asoshi dang inyaka arur, ta pai ashi. District asemanger ya terenlok aser lenmang aisü nung joko mapang talangka senzüka toktsür, ta paisa shisem.

Paisa Ao Senden-i tanü tashi CNTC maparen ajak nung nungitta asoshi pelaba den tarutsü nunga maneni kasa tangatetba nung yariteptsü asoshi ayongzüka liasü.

CNTC tatong tir, Khondao Ngullie-i jembidang, kin asem maparen ajak nung meimtepa aser yaritepa aotsü asoshi ajungshiba den CNTC (Mokokchung, Wokha & Zunheboto) ya Nagaland mulung lir, anungji, Naga nung songjen ajungtsü asoshi bilema inyaktsü tayongzüka agütsü. Aor ya maparen ajak nung tejakleni aoba

kin lir, "nenok nungi aika angazüka arudar aser maneni angazüka aotsü imlar", ta paisa shisem.

CNTC tatong tir, Hukiye Yethomi-ia mapang tatsüka agidang, asen jakdang tebilemstü aser teinyaktsü wadang aika lir, anungji, "lungjema lira asenoki mapa tulu inyaktetsü", ta ayongzüker.

Iba sentong nung tawa tentetba Central Naga Women Association (CNWA) tir Atoli Sumi, CNWA tongti zülur Zujano Patton, CNWA Joint Secretary Aienla parnokisa mapang tatsütsü agia jemi. Aor lokti tentet nungia nisung kari shilem agia liasü.

Tanü/asüng tsüngta nung CNTC ketdangpurtemisa Chungtiayimsen (Tzürangkong), Mangkolemba aser Longchem tesemtem sema jajatsü aser yangji aliba lokti tentet balala den mensem akatsü sentong renema lir.

CEO Nagaland ajanga election ketdangsür den senden amen



Dimapur, Chiteni/July 27 (TYO): Chief Electoral Officer, Nagaland, V. Shashank Shekhar, IAS ajanga Deputy Commissioners/ADC & District Election Officers (DEOs), Electoral Registration Officers (EROs), Assistant Election Officers (AEOs) aser Technical nisungtem den 'Amendment of Forms and IT applications' indang nung video conference ka July 27, 2022 nü mena liasü. Iba senden nung Joint CEOs, Awa Lorin aser Sharon Longchari dena liasü.

Iba senden nung Parliament ajanga maka kuma amshiba Election Laws (Amendment) Act, 2021 indang jembia liasü, koba Representation of People Act, 1950 aser Representation of People Act, 1951 tera melenshiba lir.

Iba Acts nung item temelenshi ya lir:

- i. Electoral registration/authentication atema Electoral Registration

officer-i Aadhar number meshitsü akok.

- ii. Küm ka nung qualifying date pezü alitsü.
- iii. Service aser Special Electors atema Gender neutral provision alitsü aser
- iv. Election agitsü atema tesem mükatsü tashi.

Aadhar number agütsüsü ya voluntary lir. Aadhar number malirtemi Commission ajanga shia aliba kuli kaket 11 nungi mashi ka agütsüsü akok, ta CEO, Nagaland ajanga ashi.

Iba maparen ya August 1, 2022 nungi tenzüka April 1, 2023 tashi alitsü. Tang aliba elector temi Aadhar number magütsütetba mechi electoral roll nung alir kata indoktsü makok, ta ashi.

Aadhar number meshiba ya electoral roll nung elector jangjatsü aser tarutsü nung parnok nem electoral services agütsüsü atema lir, ta metetdaksü. Iba amala data bendenba junga rizünga ayutsü

asoshi mera tesashi yua lir.

Tangbo küm nung qualifying date pezü alitsü aser itemji January 1, April 1, July 1 aser October 1 alitsü.

Electoral roll nung inoktsü atema applicant temi annual summary revision mapang agütsüsü, ta ashi.

Taoba mapangbo January 1 tashinung arishi küm 18 ajungertem par sasa tenüng züluokteta liasü. Saka tang qualifying date pezü lir astinung, küm nung qualifying date mashi nung arishi küm 18 ajunger temi pei sasa tenüng züluoktetsü, ta pai ashi.

Iba senden session tanabuba nung Forms yanglushia aliba aser ERONET, Garuda, NVSP, VHA aser Voter Portal amala IT applications indang jembia liasü, koba AEO Kohima, R. Toshimeren, AEO (MIS) CEO's office, Ketousieu Khruomo aser Project Manager (IT), Iliho nungertemi agia liasü.

Tseminyu nung August 2 nü school uniform angati agütsüsü

Dimapur, Chiteni/July 27 (TYO): District Education Officer In-charge Tseminyu, Yahuto Kath ajanga sangdong ka nung ashiba agi, district nung Government Primary School, Government Middle School, Government High School aser Government Higher Secondary School ajak

nem school uniform angati lema agütsüsü.

Iba sentong ya August 2, 2022 anüngdang 11:00 ako nungi tenzüka EBRC Training Hall Tseminyu nung alitsü, ta sangdong ajanga ashi.

School shiai uniform agizüktsü atem school seal bener tesayur mashi yoktsü

akok. Ajisüaka Performance Incentive Grants (PIG) atema shimteta aliba school 20 indang tekolakpur aser tang NECTAR The Lighthouse kübok maparen teinyakdak aliba school tekolakpur ajak iba sentong nung arua adentsü metetdaksür, ta sangdong ajangasa ashi.

Dimapur Changki Youth Forum ajanga "Akenten Oyim Rhemla" sentong ayongzük



Dimapur, Chiteni/July 27 (TYO): Dimapur Changki Youth Forum aser Trailblazer Society, Nagaland ajanga July 23, 2022 nü Changki Mission Aki, Dimapur nung "Akenten Oyim Rhemla" sentong ka ayongzüka liasü.

Iba sentong nung alakteta jaoker Temsunochet Changkiri, NPS, Addl. DCP (Protocol & Traffic) Dimapur liasü aser pai kaketshirtem dang temolungtetba tulu nung pei mapa nung rangloker bendanga agütsür azüngtsü ajungshia liasü.

Taoba Pro-Vice Chancellor, Nagaland University, Dr. Lanu Anichari ajanga lokti dang tetsü oshi wazüka ayutsü indang jembia aser Tsüngrem dak tamang akatsü ayongzüka liasü.

Iba sentong mayongzükdang 'Online Changki Song competition' sentong akaba nung nisung 36-i shilem agi aser "Temoi Ketba Changki" atema Chubamenla-i takok angu aser "Tani Esung Longjemsuro" atema T. Akala Jamir-i Viewer's Choice Award ngua liasü.

'Changki Ayu Küba ABC-

123 Kaket' nung ajemdaker Changki Language examination agiba nung kaketshir 45-I shilem agia liasü. Iba tatidang nung Junior, Senior aser Open category tem nung takok angur nem senpet agüja liasü.

Kasa sentong nung Trailblazer Society ajanga Changki nungi HSLC Examination 2022 nung Top 20 jenjang tongteter nem tetushi agüka liasü aser parnokji Entinola Aonok (Top 6th Rank), Moakala Longchari (Top 11th Rank) aser Alimen (Top 16th Rank) nungertem liasü.

NDPP 5 Ghaspani-II A/C ajanga asükhü lemsateper

Dimapur, Chiteni/July 27 (TYO): Medziphema Town kübok Ward-9 nungi Kuolie Niphi (Retd. DEO Dimapur) par kidang asüba atema NDPP 5 Ghaspani-II A/C aser asen constituency MLA Zhaleo Rio, IAS (Retd.) kanga sasar, ta NDPP 5 Ghaspani-II A/C sangdong ka ajanga ashi.

Pa ya Youth Organization,

NDPP 5 Ghaspani-II A/C tir Matthew Niphi tebu liasü. Nüburtem asoshi bendanga agütsür inyakba aser temeim agi sünger aliba lenir ka asüba asoshi onoki mangyimer aser mangyimer kibong nem taochi akaba Tsüngremi temolung tesunep aser anisüngzük agüjang ta sarasademtsür, ta sangdong ajanga ashi.

Sovima Village Council ajanga temzüng kar yanglu

Dimapur, Chiteni/July 27 (TYO): Sovima yimtsüng kübok nisung kari ozüng alema aser tim masüba mapa inyaka yimtsüng tenüng menüktsüba mechi Sovima Village Council (SVC) ajanga temzüng kar yangluogo.

SVC sangdong ka ajanga ashiba agi, ki kar nung danga temesepba mozü ayokba metetra item ki-o-jen Council-i agitsü aser idangjisa land registration agientsüsü. Item ki-o-jen aser aliji Council ajanga tapet yimya nung amshitsü. Temesepba mozü ayokertem dang senchi achitsü aser yimtsüng nungi meindoktsü.

Yimtsüng nung nisung kar danga IMFL ayokba putetra,

senchi achitsü aser yimtsüng nungi meindoktsü aser parnok ki-o-jen Council-i agitsü, ta sangdong ajanga ashi.

Ki para nung alirtem inyaksangshi mittsü asoshi ki/ali kibur khuret asütsü aser ita ka tsüngta ki/ali kiburi par ki/ali nung alir indang noksa, mobile number, Aadhar/EPIC document tem Council nem agütsüsü, ta ashi.

Nüburtem temeden wazüka ayutsü aser ozüng alema senotsü saruba nungi shishilempar kumzüka ayutsü mechi yimtsüng telungzük nung business establishment ajak nem Council ajanga trade license agütsüsü, ta SVC sangdong ajangasa ashi.

Minority Affairs Cell, Planning & Coordination Dept. ajanga jangjashitsür

Dimapur, Chiteni/July 27 (TYO): Pradhan Mantri Jan Vikas Karyakaram (PMJVK) 2023 kübok Government of India nem proposal tem agütsüba dak sendakba nung social aser print media nung indang Sorkari angazüker, ta Minority Affairs Cell, Planning and Coordination Department ajanga sangdong ka nung ashi.

2021-22 tashinung mapa kuma inyakba PMJVK scheme ya Nagaland nung Niuland block kisüng atema liasü. State sorkari Central sorkar dang iba scheme ya Nagaland tesem ajunga nung agütsüsü jembia aser Chief Minister Neiphui Rio-i temolung agüja inyakteper ajanga state nung district ajak 2022-23 nungi tenzüka iba scheme atema temsüa kumdaktsü. Government of India ajanga iba scheme ya State ajunglen agütsüsü molungogo, ta sangdong ajanga ashi.

State atema Government of India nem consolidated Plan agütsüsü mechi Minority Affairs Cell ajanga Deputy Commissioner tem dang küm pungo perspective plan 2022-26 nung inoksemtsü asoshi pei district atema project agütsüsü ashi. Deputy Commissioner kari parnok tangatetba agütsüogo. Government of India nem agütsüba Plan ya

proposal tem bendener agütsüba kisüng lir, aser iba ya online PMJVK web portal nung agütsüba dang lir. Project ajakbo külemi benoktsü makok, koba küm pungo tsüngta benoktetsü. Item project shimtsü aser final approval ya Ministry of Minority Affairs, Government of India ajanga agitsü, ta Minority Affairs Cell, Planning and Coordination Department ajanga ashi.

Lokti tentet balala aser nisung kari onük benokba dak sendakba nung, iba scheme kübok submit süa aliba list tem den ano list talila agütsüsü asoshi State sorkari Government of India dang asüngdanga lir. Ajidang masü Minority Affairs Cell ajanga submit mesüi aliba mabensai agüja aliba Deputy Commissioner tem dang küm lemsar project indang list tem scheme indang guidelines nung aliba ama pei District Level Committee tem nungi temelaba agir August 6, 2022 tashinung agütsüsü tezüluba nung agütsüogo, ta ashi.

Anungji tekalen jangjashija aliba nung ajemdaker, social aser print media nung State sorkari Government of India nungi sen agizükogo mesüra iba amala sen mesütepi lemsa ta tapi agi osangtsüsang prokshia aliba ya meshidak lir, ta Minority Affairs Cell, Planning & Coordination Department ajanga ashi.

Meghalaya BJP Iennir Bernard Marak puogo



Shillong, July 27, 2022

(Agencies): Meghalaya kübok Tura nungi BJP MDC Bernard N. Marak puogo. Mongulbarnü Uttar Pradesh nung pa apu.

BJP Iennir Bernard yagi Tura nung teküp ayokdak ka lapoka lir ta tai tonglokja lir aser iba Uttar Pradesh Police-i pa apu.

Tura BJP MDC Bernard N Marak (Rimpu) jenshiba agi Meghalaya police-i linük ajungalen aliba police stations nung 'lookout notice' ka agüja liasü.

Meghalaya police-i police

station ajak dang Bernard Marak ngura aputsü atema tetuyuba agütsü.

Taoba Hokolbarnü police-i Bernard Marak's farmhouse mita aodang nisung 69 apu aser iba tesem nung ozüngi memelaba yi, contraceptives aser condoms aika ngutet. Maneni iba farmhouse nung tanur 6 shibanga aliba kümzük.

Honibarnü West Garo Hills (WGH) Police-i Edenbari nung aliba Bernard'er farmhouse maneni mita ao. Azüklen menden asemben amentepa

atuba ki nung takdang 30 shi lir ta police-i ashi.

Bernard aser pa den yaritepertemi iba farmhouse ajunga ya teküp ayokdak ama benshi ta police-i kulitem bushitetogo.

Immoral Trafficking (Prevention) Act of 1956 nung ajemdaker Bernard anema ken o ka benoka lir.

Bodbarnü pa Uttar Pradesh nung magisterial court ka tsüingdangi anir ao aser transit remand atema temelaba meshi.

Meghalaya police telok kati Bernard Marak state-i meyipa anir arutsü. Meghalaya police telokji Uttar Pradesh-i apusoa ogo ta osang angazüker.

Parnoki pa asüng Meghalaya-i anir arutsü akok.

Meghalaya BJP vice president Bernard Marak ya July 26, 2022 nü Uttar Pradesh kübok Hapur nung apu.

Bernard N. Marak ya Bharatiya Janata Party (BJP) Meghalaya unit indang vice-president aser District Council (MDC) Member lir.

Meghalaya nung tesayur 2,447 regularise asür

Shillong, July 27, 2022

(Agencies): Meghalaya cabinet-i lower primary school tesayur 2,447 regularise asütsü molunga agizükogo ta Chief Minister Conrad K Sangma-i ashi.

"Onoki tesayur 2,447 regularise asütsü lemtetogo aser tang nungi parnoki regular employees ama tajangzüktem angutsü. Iba ya tesayurtemi mapang talangka takhangba agüja aruba lir" ta pai ashi.

1993 küm state sorkari lower

primary schools ketdangsütsü tenzükdang tesayur aika regular government employees aküm, ta Conrad-isa ashi.

Ajisüaka, iba mapang tesayur 2,447 tashi regularization atema ayu aser iba jagi pension aser tanga tajangzüktem mangu, ta paisa metetdaksü.

State sorkari iba mapang district councils nung school 2,568 agiang school 136 toktsü aser sorkar magi, ta paisa shisem.

Assam nung nisung 686 aser Arunachal nung 104 dak COVID-19 putet

Guwahati, July 27, 2022

(Agencies): Assam nung nisung 686 dak COVID-19 putetogo aser parnok züngsema nisung ajak agi 7,36,307 kümogo.

Tanü Dibrugarh nung nisung 53, Dhemaji nung 45, Lakhimpur nung 45, Cachar nung 43 aser Baksa nung nisung 37 dak COVID-19 putet.

Sample 7,499 tendangba nungi nisung 686 dak putet aser iba jagi positivity rate 9.15% ajemogo, ta National Health Mission (NHM) bulletin nung metetdaksü.

Assam nung tang nisung 5,543 anepaludar aser 7,22,750 taneptsü nguogo. Maneni, tanü tashi nung COVID-19 vaccine

indang dose 4,81,61,874 agütsüogo.

Arunachal Pradesh nunga nisung 104 dak COVID-19 putet aser parnok züngsema nisung ajak agi 65,513 kümogo.

Arunachal Pradesh nung tesüiba ita ana tashi COVID-19 free liasü saka July 1 nungi COVID puteta arur ta State Surveillance Officer Dr Lobsang Jampa-i ashi.

Arunachal nung tang nisung 448 anepaludar aser nisung 64,769 taneptsü nguogo.

Tang tashi nung nisung 17,95,425-i COVID-19 vaccine agiogo, ta State Immunization Officer (SIO) Dimong Padung-i ashi.

GOVERNMENT OF NAGALAND
STATE COUNCIL OF EDUCATIONAL RESEARCH & TRAINING
NAGALAND: KOHIMA

No.SCERT/TET/GEN/CORRES-2/2022/ Dated Kohima the July 2022

INFORMATION

In pursuance to NCTE notification F.No.-NCTE-Reg1011/78/2020-US(Regulation) Hq/99954-99992 dated 9th June 2021 regarding extension of validity period of TET certificate, this is to inform to all the candidates who have qualified the N-TET held in 2013 and 2016 to submit their N-TET passed certificate along with the professional certificates (DPSE/D.El.Ed/ B.Ed. etc.). This exercise is necessitated to revalidate the N-TET certificate for life time.

The above mentioned documents may be submitted at SCERT, Room No:17 on or before 18th August 2022. Failing which no application will be entertained.

(N.CHUMCHANBENI KIKON)
Director,
SCERT, Nagaland, Kohima.



Meghalaya Chief Justice Sanjib Banerjee-i Meghalaya nung e-court fee system tenzüksüdang agiba noksa angur. India nung iba system tenzükba state tem rongnung Meghalaya ya 17 buba lir. Iba sentong nung Meghalaya Law Minister James P K Sangma aden.

WORLD HEPATITIS DAY

28TH JULY 2022

THEME
"Bringing Care Closer to You- Hepatitis Can't Wait"

- ▶ Hepatitis agi kangshirtem asenoki bendanga mamshili aser senzüka meyutsüli.
- ▶ Temang nung iba tashidak adoktsü ama bilemertemi Hepatitis tendangtsüla.
- ▶ Mashisa tetsür ajaki Hepatitis tendangtsüla.
- ▶ Asenok ajak longjemer Hepatitis samatsü atema inyakdi.

HEPATITIS INDANG TONGTIPANG TEMTETETTSÜ ONÜK PUNGU:

HEPATITIS A (HAV) :

HEPATITIS B (HBV) :

HEPATITIS C (HCV) :

HEPATITIS D (HDC) :

HEPATITIS E (HEC) :

A vaccine preventable highly contagious infection spread through contaminated food and water or close physical contact and is found in the stool and blood of infected person.

Potentially life-threatening infection and is transmitted through sexual contact, blood or other body fluids, mother to child. Vaccination is available for prevention. Lifelong treatment once infected.

Spread by contact with contaminated blood e.g.; - sharing of infected needles or infected unsterile tattooing. Most common among IV Drug users. Over time it will lead to liver Cirrhosis and Liver cancer. There is no vaccine available. Medication can cure 95%-98%

Can develop when a person already has Hepatitis B. Transmitted through sexual contact, blood and blood fluids.

Spread through contaminated food or water and is commonly experienced by frequent travellers. Causes acute liver infection and in pregnant women it can be fatal.

ANGATI District hospital ajak nung Hepatitis B & C atema screening aser treatment angutsü.

ANGATI District hospital ajak nung Sero Positives atema viral load testing sütettsü.

FOLLOW US

Instagram: [nhmnagaland](#)

Twitter: [@NagalandNhm](#)



TIR YIMYIM YIMOBILEM (EDITORIAL)

DIMAPUR YANGTEPNÜ, CHITENI (JULY) 28, 2022

Electric tesangwa benjong

India yimten nüchiso ngur taküm küm agi küm 75 ajungba mong amongba sentongtem rongnung electric light ajanga nübortem nem anisüngzük aser tajangzük bener arutsüba electricity benjongmong, Bijli Mahotsav, sentong linük nung district shia tesem tesem nung nübortem den agiyonga aoba ya sentong tongtibang ka asütsü. Atangji, nübortem asoshi yimten nüchiso angubaji peisasa pei dak apet temzüng ozüng yanglua shinga yimten küboka melii sademsadema pei lima nung pei kibur kümer alitsüba tashi aser temeten anguba mapa ka lir. Ajisüaka, tanü putu nungbo electric tashi peria makaba linüktembo, yimten nüchiso liaka, nübortem taküm lia aotsüba nungdaktem asoshibo tangar dak nendaka alitsüsa akümer, anungji yimten nüchisoji tenüng dang ashi, shitakba yimten aser nübortem libalirubo tangar kübok, nüchiso manguba nübortem ama kümer alir. Aji oda, tanü Nagaland nung alir tia apibo, India küboksä süaka yimten nüchiso ngur küm 75 ajungba mong amongtsüsa, wadang ka nung danga nüchi purtem aliba aser nüchi purtemi inyakba mesüka mangur. Aji oda, tangar yimten nüchiso ngur külen gari lenmang aser apu junga yangluba benjong, alu junga yimtetba benjong, nübortem nungdak kechisarina yanglua agütsütetba industry aser mill-tem benjong, mozü ki tajung yangluteta medical college-tem kümdaktsüba benjong, kaketreju tapu balala engineering dena angazükdak rejutem yangertetba benjong ta yimten nüchiso anguba den nisungtem dena nüchi kümer inyaktetba takok aser temoatsü anguba benjong monger memongma amonger. Ajisüaka, Nagaland nung nüchiso anguba ajanga anguba tajangzük aser temoatsütem indang banjong yanglua amongtsüsa asenoki inyaktetba mapatem kangabo mangur. Atangji, Nagaland state-a India telongjem kübok alinungji, aka maka ta mali, linük sentong sülen anidaktsüsa akümer, anungji electric tesangwa benjonga amonger saka electric tesangwa benjong sentong tagidak aser temongdak nung light oadoker. Asenok taküm tiaji yangji lir. Atangji, küm 50 tejaklen Nagaland kübok yimtsüng kar nung electric light tonga aru tenzük dang, mezüng yimtak electric light tsüklokba aonungjibo tepela agi nübortem ola tulu adoka pelatep aser tepela aser tesüngmang agi amuia moutet. Ibaji yimtaki electric tesangwa aruba benjong liasü. Aji oda, küm 50 tejaklen kümbok milen tsükloker jajaba mapang mesüra kerosene amshiba milen tsükloker sentep agiba aser lesson bushiba mapang electric light arubaji tesüngmangtsü tepela aser anisüngzük tulu liasü. Iba tensa mapang denji kodang tanü asenok aliba putu mapang ya medemdangdir, joko electricity tashi ya tesangwa kisüng atema masü saka mapa ajak electric tashi nem inyakdaksüba putu mapang ka nung asenok liadokogo. Iba jagi tangarbo electricity benjong amonger. Ajisüaka, asenokbo küm 50 tsüngda nunga, tanga mapa inyaktsüabajibo yutsür, tesangwa kisüng asoshia light magütsütetter. Tangar state nung light tashi yabo agir magima adoker saka asenokbo tangar dang nungi light tashi aliba sen dena magütsütetba mapang ka nung alir. Joko, tanü putu ya technology putu, anungji mapa ajak light tashi agi motor ka longdaksüba agi mesüra yin ka tsükdaksüba aser mesüra mekongdaksüba agi inyaker. Asenok aji kata maka. Iba jagi lanurtem aika zünger peisasa electric light tashi agi mapa tilaka tenzüka inyaknüaka meinyaktetter. Ano, talisa lanurtem aikati yimtak nungi pilar alu yima linür saka alu nungji electric light maliba agi alu meyimtetter. Tangarbo electric tashi agiba sen ajemer, power subsidy agüja alu tonga electric tashi bener oa aluyimertem nem agütsür, saka asenokbo aji maliba agi alu meyimtetter. Iba jagi tangarbo alu nung dena electricity benjong, Bijli Mahotsav, amonger saka asenokbo light junga maruba agi electricity benjong sentonga junga magiteter. Asenok o pi na tsüngda nüchiso benjong amongba tetsüngdaji aji lir. Asenok tang tashi suwar amai lir, iba jagi teinyakbo kecha meinyaker saka tanguba temang aginer aser chinür. Iba jagi asenokbo benjong amongtsüsa maka, saka tangari mongang ta ashiba agi suwar pela pelaa amonger.

OLEMSABANG

HEZEKIA TENDAK SENNAKERIB ASER TANÜ RSS

~ Ayutemjen

(Yashi adok nungi...)

Tawa tanü tatalokba:

Asen kidanger Assam nung Guwahati tsütsü Amri Karbi lima Merangkong Godhula Mission nung Tsüngremi mapa tulu inyaka kanga takok ngua aruogo. Joko Arogo aika amenteter par mungdang tenzüka kanga tashi ita odagi. Iba terenlok ngua Assam nung RSS-BJP lenir kari, parnok Hindu liasüba kodaser Khristan aküm ta bushiba angur (Ref. <http://fb.watch/dpzG7R9Dba/>). Asen Naga lima nunga Naga nungeri anir Durga Puja amung tenzükogo. Yoga Day amungtsü tenzükogo. Naga Khristantemi kodanga Durga Puja, Yoga Day ama munga maru. 2014 nungibo Post Matric Scholarship Theology azüngertem nem agütsüba anenogo. Naga nungeri item süoki ia mebiler. Theology azüngertem tazünger rongnung joko mezüngoki kümogo. Iba yagi Theology azüngtsü menüngdak ta sayur. Yabo Khristantem temejai akümba Nagaland Government-i danga agütsütettsü koka lir saka Naga lenirtemi züngoka maliba angur. Yamaisa maneni ora küm ishika tsüngda yim shia nung Mandir amenloktsüsa akümtsü. Jungjunga sarasadema bilemdangdi.

Sennakeribi ama tanü asen Khristantem atalaja amokmerenba mapang asen lima nunga Hezekia Chubaji shiba asütsü. Hezekia ama chichia Tsüngrem dak amangra aser sarasademra Tsüngrem asen tsütsü alitsü. Aseni tongpangji akoktsü. BJP anema jembiba aser züluba ya mangatertemi tai ta ashitsü akok, tanga party ka pukhümer ta ashitsü akok, saka BJP majung ta ashiba kuliji tanga kecha masü ya asenok Khristan anemba telok kobai Khristantem rishikangshir aser samatsütsü meranger. Aji agi taküm Tsüngrem anema inyakba jagi yabo majung ta

ali süoki ia angajemtsü asoshi zülur. Talisa asen Aori anir Naga nungeri Center nung ruling den adentsüba dangbo memerangtsüla. Asenoka pei tangatetba takang akaba yimden ka, iba lokti (Party) tejangja alitsüla. Seplasepshiba party menüngdak.

India lima ya yimsü balala amangertem külemi aliba lima ka lir. Yimten yimsüsübaren Hindu, Muslim, Sikh, Khristan ta melemdangtsüla. Lenisüba nung shiba tetemsü pai/lai yimsü asüba agi linük nübortemji tiptema yimsü sütettsü. Temzüng nung Indiaji "Secular State" ta Indian constitution preamble nung zülua lir, koba tetezü tamangba yimsü shinga mesentoktsü, nisung shia pei amangnüba amangtsü temeden agüja lir. Tanübo RSS-BJP-i ibai melenshia tanga yimsü kecha makai tekaratiba nung "Hindu lima" (Hindu Nation) "Hindu Rashtra" kümdakja nübur ajak Hindu kümdaktsür, iba yimsüyimbong nung yimsü asütsü meranger.

Sürabangla asenok tamangertem asoshi item tetsübutstütem tejanga metetsümonga aseni parnok nem vote agütsüra na shiba asütsü?

MANENI LEPSHIDI!

Yisui asenok dang asüngdang,

"... saka nenoki ni shiba-a ta ashir?"

Mati 16: 15

Temeim Adianu/Adianutsür,

Ne Telangzüba Kechi?

Sarasadema nai langzüdi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Syria nung rocket amshia Tenla ki ka amak; nisung ana asü



Syria linük nung Hama yimti anasa aliba Greek Orthodox Hagia Sophia Tenla ki rocket amshia amakdang tangokba noksa nung angur.

July 27, 2022: July 24, 2022 nü Syria nung Tenla ki tasen ka semzükbä sentong nung lokti adenshia lia rocket ka amshia Tenla ki amakba lendong nung nisung ana asü aser nisung 12 yirügo, ta International Christian Concern (ICC)-i metetdaksü.

Syria nung Hama yimti kübok Al-Suqaylabiyah anasa aliba Greek Orthodox Hagia Sophia Tenla ki rocket ka amshia amakba video ji social media nung kanga prokshio. Iba lendong nung nisung asüba aser yiruba dang masü saka Tenla ki-a tera raksa; iba ya mejangjaba kiralongrar telok kari asütsüa akok, ta osangbenertemi metetdaksü.

ICC Tir, Jeff King-i, "Amongnü (July 24) Syria nung Khristantem amakba osang

angashia onok jashir. Civil war mapang piyong Syria sorkar, Turkey, Russia aser tangartemi linük azüoktsü merangba asenoki nguogo. Amongnü amakba ajanga telok balalai tashi raktep dang tai maket Khristantem lendongi yokba bilemtetdaksür. Syria nung telok balalai nüburt em atema mebilemstsüba kuli maneni sayur. Iba lendong nung takoksa angurtem atema onoki sarasademtsür," ta metetdaksü.

Greek Orthodox Patriarch, Antioch, John X-i iba tatalokba aitsüba den külemi asürtem atema magyim jashi lemsat ep aser yirua alirtem tekaraba nung taneptsü angutsü atema sarasademtsür, ta metetdaksü.

John X-i, "Suqaylabiyah nung asen chirnurtem pei

tamangba yimsü atema azü tokshir. Suqaylabiyah nung atalokba ya aitsütsü tetemsü; iba ya kiralongra mapa lir," ta metetdaksü.

Al-Suqaylabiyah nung aliba Hagia Sophia Tenla ki ya Istanbul nung aliba Hagia Sophia Tenla ki mesüka yangluba liasü. 2020 küm Russia sorkari yaria Bashar al-Assad-i aniba Syria sorkari iba Tenla ki commission asü.

Syria nung Turkey, Syria aser Russia linüktem tsüngda tashi raktepba mapang ka nung Al-Suqaylabiyah nung Hagia Sophia Tenla ki ya yanglu.

Amongnü Tenla ki amakertemji tang tashi nungbo mejangja, ajisüaka iba ya Turkey-i pusemba telok kar mapa asütsüa akok, ta bilemer. Iba region nung linük aikati tashi raktepba ajanga tensa majunger aser ibaji ajanga Khristan nütütsüng kanga ajema akümer.

India nung ketdangsertemi Khristan putir ka bendangleni aotsü lia nokdang

July 27, 2022: Senotsü tsütsü ochimashi nung tai tonglokja ketdangsertemi south India nung Protestant putir ka bendangleni aotsü lia nokdangogo.

South Kerala nung aliba Arogo nungi Church of South India (CSI) putir, Dharmaraj Rasalam July 26, 2022 nü UK-i aotsü atema Thiruvananthapuram international airport nung lia apu.

Ketdangsertemi putir dang Enforcement Directorate (ED) matsüngdangi arung, ta tuyuogo.

Arogo lenirtemi ashiba agi, Khristan putiri kecha aibelena mali; pa anema bushisüngdangba sülen pai aibelena malibaji jungkai adoktsü.

Tawa Enforcement Directorate nungi ketdangsertemi putir Rasalam'er ki densema Arogo lenirtem aser Arogo office aika mita oa liasü.

Arogoi ketdangsuba Dr.

Somervell Memorial CSI Medical College, Karakonam nung admission sütsütsü, ta nangzüka Arogoi sen aika benden, ta tai tongloktsüba sülen ED-i Arogo office tem mita ao.

Arogo otongdar, Jayaraj-i, putir aser Arogo ketdangsertem anema tai tongloktsübaji tiyazü nung tai tongloktsüba lir; iba nungji ochi mali, ta metetdaksü.

Tamalena Kerala police Crime Branch-i kasa medical college nung ketdangsertem nem tai tonglokja liasü, ajisüaka aibelena aliba kuli kecha mangu.

Crime Branch-i bushisüngdangba ajanga bushitetba kulitemji Kerala High Court-i magizüki liasü.

"Iba ya nisung kari medical college tenüng menüktsütsü atema inyakba lir. Onoki ED mesüra bushisüngdangba agency kecha tsübua mali, kechiyong onoki miimshitsüsa kecha mali," ta Arogo otongdari metetdaksü.

ANOGO ABEN TSÜNGREM DEN

Yakob Tsüngrem

- T.Ken 146:1-6

"Shiba pei teyari asoshi Yakob Tsüngrem lir, shiba teimla Kibuba pa Tsüngrem dak lir, tepelatsü" (t.5). Iba yagi tanü aser asüng asen nüngdak ajakji Tsüngrem lir ta ashir. Kodang nai Tsüngrem metetter, na tepela kar, teimla aser teyari kar: Pa den jajaba nung tepela, tanü tebilemstsü khuret abener asoshi teyari aser tarutsü asoshi bilemba nung teimla. Talila nai kechi aginer ?

Yakob Tsüngremji shiba? Mezüngbuba, Paji teyanglur. Tekong 6 ashir, Pa, "shibai anüng aser ali yanglu, tzüyim aser item nung aliba ajak; shibai atangji teti ayur" Iba lima yanglua taküm lidaktsütsüsa uluba nung teperi shisatsü teperi aser tashi teperi pa lir. Pai tanü asen tebilemstsü ajak nung yarir.

Tanabuba, " Pa obendanger, shibai tajemreper nem ochi agütsür" (t.7). Kodang nai tai makaba nung aitsür, Tsüngremi metet. Obendangbaji pa nem yujang. Tsüngremi dang raratsü akokba nung ne mapang teindok. Pa nübür ajak den Pa dena lir, aser Pai kechi shidak aji inyaktsü.

Tasembuba, Paji Tebu lir. Tekong 7 nung tebu ayabatem mesüba noksa agütsür. Tsüngrem o-l teti asenok dang Pa temoatsü tejangja sayur. "Aser kü Tsüngremi Kibuba Yisu Khrista nung Pa sentsüwangshi nung Pa rongsen yari nenok tenüngdaksü ajak agütsütsü" (Fil.4:19).

Pezü, Pa tekümzüker. "Kibubai puoka alirtem nem nüji agütsür. Kibubai tenük tapoktem lapoktsür.... Kibubai temeshipur meimer" (t.7,8).

Tatamsa, pa chuba. "Kibubai teti chubatsü" (t.10). Ken ken nai bilemstsü, "Ni iba ama chuba ka akatsü metemsü. "aji shitak, saka Pa Yakob Tsüngrem lir. Yakobi metsüdak, aser aibelen, saka Tsüngremi Pa Tsüngrem ama ali. Tatem maka Tsüngremji asen jenokdak lir.

Tsüngremji ne jenokdak tulutiba lir. Saka odangbo na mejenokdaksür; Pai na asoshi tashi agütsür aser na tashi itdaksür. Yakob Tsüngremji ne Tsüngrem asü? Yamaji süra, Pa dang jaang aser Pai na yaritsü.

Sydney McLaughlin-i otsü tasen yanglu, Tsüngrem nem tenüngsang agütsü



Eugene, Chiteni/July 27 (Agencies): U.S. Olympic gold medalist Sydney McLaughlin-i 400-meter asemtepba nung otsü yanglua aliba taoba Hokulbarnü Eugene, Oregon nung World Athletics Championships alidang melenshia liasü.

Osang ajanga ashiba agi, McLaughlin-i Hokulbarnü asemtepba mapang second 50.68 nung alizüng tongteta lai taoba mapang second 51.41 nung tongteta aliba raksaja

temoatsü asoshi Pa tsüngdangi tasü ita arung. Aser tanü Pai kü nem tashi agütsü, anungji konang ajak Tsüngrem nem agütsür," ta lai ashi.

"Tekeraba nung alizüng atongtsü bilema liasü. Saka iba mapang atema kanga pelar, second 51 kübok kechi südir ibaji onok asoshi takoktsü. Anungji ni kanga pelar," ta lai ashi.

McLaughlin ya Khristan tajung ka lir aser lai la indang tamangba yimsü ya social media aser la wadang nung teti sayur.

2020 Tokyo Olympics nung lai tetsürtem meter 400 asemtepba nung gold medal nguteta liasü.

Lai iba mapang takok anguba sülen Tsüngrem nem tenüngsang agüja liasü.

Taküm may ita McLaughlin ya taoba mapang NFL asayar Andre Levrone Jr den kiyimba sentong tajung ka ayongzüka kibong kuma liasü.

OLONG PAITEP # 6243

1		2		3		4	5			
				6						7
		8								
9				10		11				
			12					13		
						14				
16						17				

- | | | | |
|----------------------------------|--|--------------------------------------|--|
| TIPILEN | | LANGTSÜNGLEN | |
| 1. Nisung jenti - (5) | | 1. Tenük telong - (9) | |
| 4. Tsük rudenba - (5) | | 2. Committee dang ajar - (5) | |
| 6. Temzüng tesashi - (5) | | 3. Yagi ki okdoker - (7) | |
| 8. S _ _ _ i - (3) | | 5. Yim lenmang - (5) | |
| 9. Nisung telesa - (3) | | 7. Temoatsü keter meyipa aruba - (9) | |
| 10. Anogoshi - (4) | | 11. Kanga junga menemba - (7) | |
| 12. Ajanga aor - (4) | | 12. Majinü - (5) | |
| 13. Tsük rizüngdak - (3) | | 13. Tzüma nung senzüba - (5) | |
| 14. Tebang nungi adokba - (3) | | | |
| 16. Süngdong tatembangtiba - (5) | | | |
| 17. Meputep - (5) | | | |

OLONG PAITEP # 6242 TELANGZÜBA

- | | |
|---|--|
| TIPILEN : | LANGTSÜNGLEN : |
| 2. Bangsemo, 6. Tiptem, 8. Jen, | 1. Yipten, 3. Nüja, 4. Sangro, 5. Milen, |
| 9. Talila, 11. Aren, 12. Tzübo, 14. Alia, | 7. Tulu, 10. Laza, 11. Aben, 12. Tiyong, |
| 16. Angati, 17. Odi, 18. Azü, | 13. Ajizük, 14. Aitsü, 15. Tasa, 16. Aina. |
| 19. Sünglang. | |

Agüja aliba noksa nung meputepi aliba 7 bushiang



TANÜBO NAI LANGZÜANG

- Q. Tawa India nunger shiba World Bank nung chief economist shima lir?
 [A] Raghuram Rajan [B] Urjit Patel
 [C] Indermit Gill [D] Viral Acharya

(Taruba adok nung onoki langzüksü)
YASHI ADOK TELANGZÜBA : Ministry of Science & Technology

AO OSHI ANGAZÜKDAK:

TANÜ ANGAZÜKTSÜBA OJANG



Naok
 (v) natzü anaba (urinate)
 * Tanuri yipten nung natzü **naok**.

Napa
 (n) aon aser süngo nung teronem menemtsü süngolemba ka (tulasi)
 * Tanü asüngbo napa agi yangluba süngo tajemtsü tapu aika angur.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

NAI-A YA METETTER MA



1979 küm July 28 nü India nung 5buba Ato Kilonser Charan Singh aküm. Pa December 23, 1902 küm Hapur nung aso aser May 29, 1987 nü New Delhi nung asü.

SUDOKU # 6281

	9	4		5	7					
2							3			
		7			2					
	6		8	2	3	5	7	1		
	7	3	5	9	1	2		6		
	2	5	4			3		9		
9		1		3		4	6	7		
	4	2			5		1			
3	8	6								

TELANGZÜBA # 6280

	3	2	5	9	4	7	1	6	8
2	4	6	1	8	2	5	7	9	3
	7	8	9	3	1	6	4	2	5
	5	3	6	7	8	1	9	4	2
	1	9	8	4	6	2	3	5	7
	2	4	7	5	9	3	6	8	1
9	6	7	2	1	5	4	8	3	9
	8	1	4	2	3	9	5	7	6
3	9	5	3	6	7	8	2	1	4

OJANG LUTEP # 5828

- IRASHNGA :
 IBALA :
 NGDA :
 NGIBNUO :
 KAMA :
 ITMA :
 RSE :
 NEAMA :
 IBAAL :
 NGBTAJUA :

OJANG LUTEP TELANGZÜBA # 5827

MEIMCHIR TAKÜM NUNG MEIMLABA MAPANG TEMOATSÜ ASER TIMTEM BALALA AJURUR

TAN HOPTA ATEMA - KOMA SÜLA ?

Q. Center government nungi yokba senotsü amshia asenok alidak terenlok mapa inyakba kuli kaket ' Utilization Certificate' nung sannüker nem dena kuli südaktsü nunga koma süla ?



New Delhi, July 27, 2022: Chiyungtsü aika nung GST saru atuba anema Bodhbarnü Congress MP temi Parliament kima Mahatma Gandhi kürakyanglu anasa longkak aيتدang tangokba noksa nung angur.

Sorkari India linük nung opposition samatsüner: Congress

New Delhi, Chiteni/July 27 (Agencies): Centre sorkari tim masüba nung bushisüngdangba agency balala amshir ta aitsüba den külemi Parliament nung opposition MP tem anentsüba atema Bodhbarnü Vijay Chowk, Delhi nung Congress MP temi mener longkak aitogo. Osangbenertem den jembidang Congress lenir, Adhir Ranjan Chowdhury-i, sorkari linük nung opposition samatsüner, ta ashi. Rajya Sabha nung opposition lenir, Mallikarjun Kharge aser Lok Sabha nung Congress lenir, Adhir Ranjan Chowdhury na densema Congress MP temi sorkari Enforcement Directorate (ED) densema agency balala tim

mesüi amshir, ta tai tongloktüsü den külemi Lok Sabha aser Rajya Sabha naprongla nung opposition MP tem anentsüba anema longkak ait. Parnokisa osettsüset nung jenjang atuba aser chiyungtsü aika nung Goods & Services Tax (GST) saru atuba anema yimyim ayima longkak ait. MP temi Parliament complex nungi Vijay Chowk tashi longkak aita aoba sülen yangji mener yimyim ayima longkak ait. Osangbener den jembidang Kharge-i, "Osettsüset nung jenjang atuba aser chiyungtsü balala nung GST atuba densema onoki onük balala nung nüburtem atema ola adoker. Onoki tem anema maneni raratsü. MP tem

anentsüba ya tim masü, parnok tanaben agizüksüla, ta onoki takhangba agütsür," ta metetdaksü. Chowdhury-i, sorkari bushisüngdangba agency balala amshiba ya shisadangra parnoki linük nung opposition samatsüner ama reprangteter, ta ashi. Bodhbarnep Congress-i, senotsü tim mesüi amshiba ozüing ya sorkari hadir ka ama amshir, ta shia Supreme Court dang National Herald-Associated Journals Limited ken o ya tekaraba nung bentettsü atema mepishia liasü. National Herald ken o nung tanü agi anogo asembuba Enforcement Directorate-i Congress Tir, Sonia Gandhi dang asüngdangyaogo.

Covid agi asür doctor tem indang osang mebenden: Bharati Pravin Pawar

New Delhi, July 27 (Agencies): Bodhbarnü Rajya Sabha senden nung Centre sorkari, 2020 küm March ita nungi tenzüka linük nung coronavirus wara agi doctor tem kwi asüar iba osangji sorkari mebenden, ta metetdaksü. Minister of State for Health, Bharati Pravin Pawar-i, "India sorkari states aser UTs-i agütsüba osang nung ajemdaker coronavirus agi shirangertem aser asürtem osang bendener. July 23, 2022 tashi nung linük nung coronavirus tashidak agi nisung 5,25,997 süogo," ta metetdaksü. 2020 küm March ita nungi tenzüka linük nung doctor tem aser health workers kwi coronavirus tashidak agi asü, ta asüngdangba langzüdang

Bharati Pravin Pawar-i iba osang ya metetdaksü. Laisa, Covid anema rarar Health Care Workers atema insurance scheme- 'Pradhan Mantri Garib Kalyan Package (PMGKP) kübok sorkari wara dak sendakba duty inyakdang iba tashidak agi asüba community health workers aser private health workers densema health care providers nem insurance sen lakh 50 agütsü, ta metetdaksü. Laisa, iba schemes ya state jenjang nung amalitepa inyak, ta metetdaksü. National Disaster Management Authority-i coronavirus agi asürtem nem sen 50,000 agütsütsü benoka liasü, ta laisa metetdaksü. Ano tanga osang ka nung

IMA national president, Dr Sahajanand Prasad Singh-ibo, coronavirus anema rarar doctor tem kwi asüar parnoki osang bendener, ta shiogo. IMA-i ashiba agi, linük nung coronavirus wave mezüingbuba mapang nung doctor 757 covid agi süogo; doctor teimtiba asübaji Tamil Nadu nung 90 liasü, West Bengal nung doctor 80 asü, Maharashtra nung 74 asü, Andhra Pradesh nung 70 asü, Karnataka nung 68 asü, Uttar Pradesh nung 66 asü, Gujarat nung 62 asü aser Delhi nung doctor 40 asü. Tanabuba Delta wave mapang nung coronavirus agi doctor teimtiba asübaji Delhi liasü; Delhi nung doctor 128 asü aser Bihar nung doctor 115 asü, ta IMA-i metetdaksü.



New Delhi, July 27, 2022: Gujarat nung yi nung miim jemsema nisung 40 dak tema asüba anema Bodhbarnü Parliament kima TMC MP temi longkak aitba noksa nung angur.

TENÜNGSANG AGÜTSÜR

Mr. Nüingmoaba Lkr aser Mrs. Tsükjemmongla Jamitsür jabaso Dr. Imnameren Lkr, Ungma yimtsüing nungi, Delhi University kübok "BLOOD PRESSURE AND ITS COMORBIDITIES" Studies nung Doctorate nguteta kin nem tenüngsang bener arutsü nung Tanüjang Kin-i pelaba metetdaksür.

Tanüjang Kin tenüing nung :

1. Lanusüngküm Tatar
2. Rongsenpokba Tatar

External affairs minister S Jaishankar-i Uzbekistan semdangtsü

New Delhi, July 27 (Agencies): Brihostibar nungi tenzüka External affairs minister, S Jaishankar-i Uzbekistan yimtiba, Tashkent anogo ananü semdangtsü; iba mapang nungji pai Shanghai Cooperation Organisation (SCO) nungi foreign minister tem senden nung adentsü.

SCO senden nungjisa China foreign minister Wang Yi, Russia foreign minister Sergey Lavrov aser Pakistan foregin minister, Bilawal Bhutto nungera adentsü. SCO senden aliba mapang nung Jaishankar-i Wang aser Lavrov na den jurila senden amentsü.

Ministry of external affairs (MEA)-i sangdong ka ajanga, SCO foreign minister tem senden nungji taküm September ita nung ayongzüka aliba SCO summit atema jembitsü, ta metetdaksü.

SCO senden ya September 15-16 anogotem nung Samarkand nung ayonga agitsü aser iba senden nungji India Ato kilonser, Narendra Modi-a adentsü.

MEA sangdong ajangasa, "Uzbekistan foreign affairs minister, Vladimir Norov-i jaokba nung ajemdaker External affairs minister S Jaishankar-i July 28-29 anogotem nung Uzbekistan semdangtsü aser SCO Council of Foreign Ministers senden nung adentsü," ta metetdaksü.

"Kasa senden nungji September 15-16 anogotem nung Samarkand nung SCO lenirtem senden atema terenemshiba jenjang asadanga o lemteptsü," ta metetdaksü.

SCO foreign ministers senden nungjisa SCO züingsem linüktem amalitep jenjang reprangshitsü aser regional den international onüktem nung o lemteptsü.



July 27, 2022 nü FICCI, New Delhi nung Union Defence Minister, Rajnath Singh-i 2buba Military Ammunition Conference 'Ammo India 2022' nung jembidang tangokba noksa nung angur.

2012 küm nungi tenzüka India nung keyi 1,000 dak tema süogo

New Delhi, Chiteni/July 27 (Agencies): 2012 küm nungi tenzüka tang tashi nung India nung keyi 1,059 süogo; aser keyi tiemba asübaji 'tiger state' ta ajaba Madhya Pradesh nung liasü, ta Bodhbarnü NTCA-i metetdaksü. National Tiger Conservation Authority (NTCA)-i, taküm-a tang tashi nung keyi 75 süogo aser yaküm keyi 127 asü, ta metetdaksü.

2020 küm keyi 106 asü, 2019 küm keyi 96, 2018 küm 101; 2017 küm 117, 2016 küm 121; 2015 küm 82; 2014 küm 78; 2013 küm 68 aser 2012 küm keyi 88 asü, ta NTCA-i metetdaksü. Madhya Pradesh nung tiger reserves 6 lir aser iba state nung 2012 küm nungi tenzüka tang tashi nung keyi 270 süogo.

Kasa mapang nung Maharashtra nung keyi 183 asü, Karnataka nungi 150, Uttarakhand nung 96, Assam nung 72, Tamil Nadu nung 66,

Uttar Pradesh nung 56 aser Kerala nung 55 asü.

Rajasthan nunga keyi 25 asü, Bihar nung 17, West Bengal nung 13, Chhattisgarh nung 11 aser Andhra Pradesh nunga keyi 11 asü. Tesüiba küm ka ser tesimal nung Madhya Pradesh nung keyi 68 asü aser kasa mapang nungjisa Maharashtra nunga keyi 42 asü.

2018 Tiger Census nung Madhya Pradesh ya India nung 'tiger state' aküm; iba kümji Madhya Pradesh nung keyi 526 liasü aser Karnataka nung keyi 524 liasü.

2012 nungi 2020 küm tashi nung ozüing alema shikarirtemi keyi 193 khaset. 2021 küm January ita nungi tenzüka shikarirtemi keyi khasetba report mali.

Ketdangsertemi ashiba agi, keyi 108 temang nung timtem ajanga asü aser keyi 44 tanga kuli balala ajanga asü.



Sri Lanka yimtiba, Colombo nung totzö inokba tesem ka nung police kati traffic ketdangsüba noksa nung angur. Sri Lanka rongsenketzüng jenjang mejungi akumba ajanga nisung million 22 ana aliba linük nung mozü, totzö aser chiyongtsü densema tongtipang oset agi nüburtim tim atemer.

Pakistan yimtenren jenjang tamajungba akumer

Islamabad, Chiteni/July 27 (Agencies): Pakistan nung nütsüng yongsük timtiba aliba province, Punjab nung yimsü asütsü atema linük nung tematiba court ajanga taoba Ato Kilonser Imran Khan-i busemba candidate ka medenja obendang agütsüogo, anungji iba linük nung rongsenketzüng jenjang mejungi aliba mapang ano yimtenren tsütsüa tia mejangjateti akumer.

Iba obendang ya ajanga April ita ato kilonser menden nungi Khan atsüngdokba teloktep party tem ajanga tentetba sorkar nem tebilemsü tali agütsür, shirnoki linük rongsenketzüng jenjang mejungi aliba nungi anitetsü atema nüburtimi maginüba rongsenketzüng tsütsü temelenshi tesashi benoktsü merangba mapang lir.

Pakistan indang Supreme Court ajanga obendang ka agütsüba nung, Punjab indang chief minister inyaktsü

toktepsang Khan-i yariba Chaudhry Parvez Elahi nem taoba hopta election agiba nung tiazü nung takok magütsü, anungji Mongulbar aonung ayatirm matongdang pa CM kumdaktsütsüla, ta ashi.

Tir Arif Alvi ajanga Islamabad nung tir aliba kidang Elahi tezüngzüktep agia liasü, ta Pakistan indang Dawn osangkaket ajanga Bodhbarnü ashi. Punjab Governor Balighur Rehman-i iba mapa inyaktsü memolungba sülen Elahi ya Lahore nungi linük yimtibai arsanga oa liasü, ta osang ajanga ashi.

Punjab assembly indang speaker-i Elahi nem takok magütsü aser pa nem agütsüba vote tem magizük aser party anema inyak ta aija ruling coalition nungi candidate nem takok agüja liasü.

Ajisüaka court ajanga speaker indang telemtetba melenshitsü.

Iba ya ajanga Khan-i election tasen agitsü asoshi

nübuyimba nung teimla ka agütsür. Pai tekeraba nung election agitsü atema linük tesem ajungalen longkak aita jajar, koba taruba küm tatemlen agitsü lir.

Khan aser pa den tokteper tsüngta atsütepba ajanga nütsüng yongsük million 220 aliba linük indang rongsenketzüng nung kanga mejungi kongshi, shirnok IMF sentong tiyongtsü ka nung lir.

Pakistan nung foreign exchange reserves ajema akumba, sentsüh tali akumba aser sen jenjang ajema akumba ajanga tim atemer. Yamaji lia iba telemtetba yagi ano sorkar aser obendangba bangdak tsüngta atsüteptsü akok.

"Iba telemtetba ya nüburtimi magizük, coalition partners den shisa agitepba sülen onok teinyaktsü atema telemtetba agitsü," ta federal minister for information, Marriyum Aurangzeb-i Mongulbar aonung osangbener dang ashi.

Onir laoba sülen Sunak aser Truss o intepba anen

London, Chiteni/July 27 (Agencies): United Kingdom indang ato kilonser akumtsü asoshi television nung sayua o intepba mapang onir laoba sülen iba sentong anentsüsa akum.

Ato Kilonser Boris Johnson melentsü atema tokteper Rishi Sunak aser Liz Truss na Mongulbarnü Talk TV channel nung o intepba mapang ola ka angashi.

Camera ya Truss tsütsü liasü, shibai meyipa repranger "Oh Tsüngrem" ta ashi aser iba sülen transmission shibang.

Talk TV ajanga mapang tatsüka lir sangdong ka nung, taonung onir Kate McCann ya sentong tom nung süchia ao aser la junga lir, saka la iba o intepba nung shilem mgitsü doctor temi ashi, ta metetdaktsü.

Mapang tatsüka menur

channel indang studio nungi ano Talk TV host Ian Collins-i iba sentong nung onir shilem agia liasü aser, nisung ishika jakdang candidate tem camera meliaka asüngdangba aser langzüba sentong agia liasü, ta ashi.

"Na temang tajungba akumba ya osang tajung lir," ta Sunak-i minute 45 shi lir Twitter nung McCann tenüng inoksema ashi.

"Iba o intepba ya tajung liasü aser ano yakta nai asüngdangyatsü imla atar," ta pai ashi.

Iba o intepba ya The Sun osangkaket aser Talk TV ajanga sponsor süa liasü, aser anaprong ya Rupert Murdoch meyong lir.

Talk TV indang political editor McCann ya The Sun nungi Harry Cole den külemi onir shilem agitsü liasü, saka

Mongulbarne Cole dak COVID-19 putet.

Ghonda ka shi o inteptsüba sentong tenezük ghonda tesadang ka aodang iba ya ataloka liasü, kong Truss aser Sunak na tax, osettsüset nung jenjang atuba aser National Health Service yaritsü asoshi lenmang tajungba atema o intepa liasü.

Hombarnü BBC nung o inteper ghonda 24 majungdang tena tsüngta tanaben buba o intepa liasü.

Tena ya Johnson melentsü asoshi tokteper, shiba July 7 nü Conservative Party indang lenir ka ama menden nungi alua liasü.

Iba party nung züngsem 200,000 shi lir aser taruba ita vote agiteptsü aser Johnson melentsü asoshi takok angur osang September 5 nü sangdongtsü.

Biden o Xi na tanü phone ajanga jembitsü

Washington, Chiteni/July 27 (Agencies): Russia-i Ukraine amakba aser Taiwan mechi anisüngzük makai aliba mapang US Tir Joe Biden aser China Tir Xi Jinping na Brehostibarnü phone ajanga jembitsü imlar, ta iba sentong indang meteta alir kati ashi.

White House national security odongtar John Kirby-i Mongulbar aonung osangbener dang ashiba agi, tena jembiba mapang linük ana tsüngta rongsenketzüng tsütsü toktepba ketdangsütsü indang onüka benoktsü.

Iba ya tena tsüngta pungoben jembir alitsü aser Beijing-i par litsü ama jembiba Taiwan-i US House Speaker Nancy Pelosi arutsü ama osang angazüka China-i Biden administration dang tekumdangtsü shir lia iba osang ya angazüker.

"Taiwan nungi tenzüka Ukraine nung rara mechi tensa mejungi aliba aser linük ana tsünga rongsenketzüng tsütsü toktepba indang onüktem jembitsü," ta Kirby-i ashi.

"Tena jembitsü ya mapang talangka nungi sentong yanglua aru aser lenir ana tsüngta jembitsü onük tongtipang aika lir," ta pai ashi.

One-China policy kübok United States ya Taiwan den tesendaktep mali, saka iba asetkong par sasa kumzüka ayutsü atema teyari agütsütsü

US oziung agi alena lir. Pelosi-i iba asetkong semdangtsü akok ta jembiba mapang, White House tangatetba aser tamendak dak memelenshi ta kanga kera telangzüba agütsü.

Tir melentsü asoshi Pelosi ya nübu tajung ka ama züngshir, anungji la bendang lima sema jajatsü ya US national security indang tebilemsü lir. Ajisüaka la senzütsü atema lai dang telemtetba agitsü.

US rongsenketzüng tajungba kumdaktsütsü mechi China nunger oset kar nung saru meshiba anentsü asü ta administration-i jembiba arur, saka iba telemtetba ya tangbo magitetsü, ta Kirby-i ashi.

US semiconductor industry atema sen billion \$52 shi agütsütsü atema US Congress nung CHIPS act asadanga mapang aser sen billion \$24 jenjang chip plants atema investment tax credit agütsütsü jembiba mapang ka nung lenir ana tsüngta jembishinü akatsü lir.

Biden-i Hombarnü iba legislation agizüktsü atema ajungshia virtual yimya nung jembidang, "Ni ibaji imlar, saka sentong renemba sülen ni metetdaktsütsü," ta osangbener dang ashi.

Anogo ishika tsüngta Senate nung vote agiteptsü aser US House nunga hopta tatemlen vote agiteptsü imlar.

Philippines north tsütsü menoknok anak, nisung pezü asü

Manila, Chiteni/July 27 (Agencies): Philippines north tsütsü menoknok tesashi ka anakba ajanga nisung pezü asü aser 60 yiru, ta interior minister-i ashi.

Menoknok ya Bodhbarnep 8:43 ako (par mapang) meta nisung ajema aser tenem agi sünga aliba Abra province nung anoka liasü. Abra province ya linük indang asetkong tongtipa aser nütsüng timtiba aliba Luzon asetkong nung lir aser iba menoknok ajanga anentsüh kar alu aser ki kar raksatsü. Iba menoknok ya mile 249 pilar linük yimtiba, Manila nunga metet, koba asetkong south tsütsü lir.

Iba menoknok ya magnitude 7.1 lir ta US Geological Survey (USGS) ajanga asadangtet, European Mediterranean Seismological Centre (EMSC) ajanga 7.2 aser Philippines Institute of Volcanology and Seismology (Phivolcs) ajanga 7.3 asadangteta liasü.

Phivolcs ajanga mapang tatsüka lir menoknok ya magnitude 7.0 liasü ta melenshitsü, saka Philippines nung küm aika tsüngta anakba menoknok rongrnung tesashitiba liasü.

Asürtem rongnung nisung ka Abra nung par kidang cement slabs tsüka asü, kong

ano nisung 25 yirua liasü aser itemji timba mozüku nung munga liasü, ta ketdangsür temi ashir.

Benguet province kübok La Trinidad jila nung strawberry tsünüba tenem ka nung kisü-jensür ka dak süng-long agi ona asü, kong anentsüh aser long mükepzüka alua lenmang kar shibanga liasü.

Tir Ferdinand Marcos Jr-i Abra-i teyariteper yoktsü totuyuba agütsü aser pa iba tesem leni aotsü sentong liasü, saka emergency services nung timtem majuruba ajanga iba sentong athi.

USGS ajanga ashiba agi, iba menoknok ya Dolores jila nungi east-southeast tsütsü mile 7 shi pilar tiyong sür anoka liasü.

Ketdangsür temi social media nung noksa lemsatepba nung ki kar laor liasü aser kar mangadaker liasü. Gari kar long agi nensar lenmang raksar liasü.

Menoknok ya second 30 shi anak, ta northern Ilocos Sur province nungi congressman, Eric Singson-i osangbener dang ashi.

Philippines ya Pacific "Ring of Fire" nung lir, koba Japan nungi Southeast Asia ajanga aser Pacific tzükum nung mile 25,000 shi lir, kong menoknok kanga anoker.

Noklak nung I Day
atema senden amen
Dimapur, Chiteni/July 27
(TYO): Taruba Independence Day sentong dak sendakba nung July 27 nü Deputy Commissioner Noklak, Hiazu Meru lenisüba nung DC Conference hall, Noklak nung senden ka menogo.

Senden nung department balala nem mapa balala nonglokja liasü. House-isa August 6 nü nübutoka mapa inyaksü aser parade practice August 9 nü nungi tenzüksü atema telemetba agia liasü.

Maneni DC-i department ketdangsur aser staff ajak dang Independence Day sentong takok nung agitetsü atema teka amteper inyaksü mepeshia liasü.

Tseminyu DPDB
senden menogo

Dimapur, Chiteni/July 27
(TYO): 4buba Tseminyu District DPDB July 26 nü Deputy Commissioner's Office nung DPDB mendenbuba aser Advisor AH&VS, and Women Resources Development, R. Khing den menogo.

Senden nung Council of Rengma Baptist Church(CRBC)-i benokba biodiversity conservation onük, taruba Nagaland Olympic and Paralympic 2022 dak rangloker District Sports Council Tseminyu tentetsüba, K. Station nung police station ka amenoktsüba, Tseminyu kübok public aser private office ajak nung CCTV inoktsüba indang onüktem benoka sensak asem. Iba den ano taruba Independence Day atema mapa alemtsü asoshi sensaksema liasü.

Kasa mapang nung Department of School Education (DEO Tseminyu)-i Power Point presentation ka agütsü. Taruba senden nung H&FW-i Power Point presentation agütsütsü. Deputy Commissioner aser vice chairman DPDB Tseminyu, Dr. Zasekuolie Chusi, IAS lenisüba nung iba senden mena liasü.

Supervisors & Enumerator tem

atema training katsü
Dimapur, Chiteni/July 27
(TYO): ULB election atema Kohima Municipal Council dak sendakba nung Electoral Roll Intensive Revision atema shimba Supervisors aser Enumerators ajak atema training ka ayongzüka katsüogo. Iba training ya July 27 nü DC Conference Hall Kohima nung agia liasü.

Training sentong ya KMC Administrator aser ERO T. Lanusenla Longkumer lenisüba nung agi aser SDO (Civil) aser AERO Nockpai Konyak-i Powerpoint presentation ka agütsü. Ajak senteper iba sentong nung trainee parnok 90 shi dena liasü.

MELUNGNGEN O

LENDEN KICHU

MAY 8, 1989 - JULY 13, 2022



Onoki teti meima aliba jabaso Lenden Kichu (Chungtia), arishi küm 33 tashi Tsüngrem taochi nung lia arur, July 13, 2022 nü iba akumli wadang tembanger Kibubar kidangi teti asoshi anisungzükdaki ogo. Ozü mulung zürepa mangyim jashi nung alidang kija, kibongtem, lokti tentet balala nungi shirnokisa nübo, rongsen aser sarasadem nung yaritepogo, nenok ajak dang iba sangdong ajanga kanga pelaba lemsateper. Alakteta tepela kar yamai lemsateper.

Dr. Victo & Family, Nikos Hospital
 Doctors & Staff of Nikos Hospital Dimapur
 Dimapur Ao Baptist Arogo
 Sümüdem Youth Ministry Dimapur
 Dimapur Chungtia Senso Telongjem
 Dimapur Chungtia Senso Tamang Telongjem Dimapur
 Chungtia Students' Union
 Ningsang Kidong Telongjem Dimapur
 Aliba Senso Telongjem Dimapur
 Chungtia Baptist Arogo
 Sabangya Compound Baptist Arogo
 Sabangya Compound Baptist Arogo Womens' Ministry
 Longtsüktep Baptist Arogo
 Ningsang Kidong Chungtia
 B. Ningsanglong Zunga Chungtia
 Yimkhum Sector Chungtia
 Leeven Sector Telongjem Chungtia
 Anitet Youth Club Lengrijan
 Bachelor's Group
 Audio Garage
 A.J. Powers

Teyanglur Tsüngremi nenok ajak talubosa moajang ta ozü sarasadem.

Temeim tsürabur, adianu aser kinungertem

OFFICE OF THE

AOLI LONGCHAR KIDONG

H.Q. MOKOKCHUNG, NAGALAND

SANGDONGER

Ao Milen / Tir Yimiyim Adok 5th May 2022 nung sangdongba ama Aoli Longchar Liyonga Jajaba Lipok Otsü Kakat nung metok meperi kar lira kakat tapak (VII) nung zülüja-a aliba ama kija den mesüi Mungdang lenir den sadok sadoka lemsateptsü nenshia metetdaksür. Ao Milen / Tir Yimiyim Adok 29th June 2022 nung koba LONGPOK SEMCHIR TELONGJEM-i tebou tenüng pezü (4) indang adoktsüogo, yamai jangjashitsür.

Aoli Longchar-i tebou tenüng zülüa alibaji tanü-ang asentena masü, saka Lipok Otsü nungi angazüka, jembia aruba otsü nung lir. Tejangja kuli, Ao Mongsen Lipok Otsü nung terajem zülüa angutsü.

Sd/-
I. Nangshi Longchar
 President

Sd/-
Aren Longchar
 Secretary

PM Modi-i Sri Lankan tir Wickremesinghe nem tenüngsang agütsü

New Delhi, Chiteni/July 27
(Agencies): Ato Kilonser Narendra Modi-i, Sri Lanka tir tasenba Ranil Wickremesinghe nem tenüngsang agütsüogo aser ashiba agi, India-i iba asetkong rongsenketzüng mejungi aliba nungi anitettsü atema teyari agütsütsü, ta Indian high commission-i metetdaksü.

Arishi küm 73 tain Wickremesinghe ya Brehostibarnü Sri Lanka tir 8buba asütsü atema tenangzüktepba agiogo.

"PM @narendramodi-i H.E President @RW_UNP dangi tenüngsang agütsüba shiti yokogo," ta Colombo nung high commission of India-i tweet asü.

"PM Modi-i Sri Lanka rongsenketzüng mejungi aliba nungi anitettsü atema maneni democratic yimya, institutions aser temzüng ozüng dak ajemdaker teyari agütsütsü ta shiogo," ta high commission-iashi.

PM-isa, nüburtem ajangzüksü aser linük ana mapang talangka

nungi tesendaktep tajung nung aruba akangshitsü atema Sri Lanka tir den tali sendaktepa inyaksü yongya ataba lemsatepa liasü, ta kasa sangdong ajanga metetdaksü.

Colombo nung Indian high commissioner Gopal Baglay-i Mongolbarnü Ato Kilonser tasenba Dinesh Gunawardena den ajurutepa India sorkar, lenirtem aser nüburtem nungi salem lemsatepa liasü.

"India aser Sri Lanka na lenla balala nung mapang talangka tesendaktep tajung nung aruba akangshitsü atema PM-i le sayuba atema High commissioner-i pa nem tenüngsang agütsü. High commissioner-isa, Sri Lanka nungertem nem India-i teyari agütsüba temulung ajak agi agizükba atema pelaba lemsatepa liasü," ta Indian mission-i tweet asü.

India sorkari Sri Lanka nem January ita nungi tang tashi nung teyari USD billion 4 shi agütsüogo.

OFFICE OF THE

MONGSENYIMTI LAISHIR TELONGJEM

P.O: Chuchuyimlang, Mokokchung, Nagaland

TENÜNGSANG AGÜTSÜR

Wb. I. Akangtemjen Jamir aser Lt. N.Repala Ozüküm na jala **Dr. Watimongla Jamir**, shiba tang Union Biblical Seminary, Pune nung Assistant Professor teinyakdak lir, la ya Mongsenyimti Laishir rongnungi Tsüngrem o tarok rajema metettsü jangraba aser sayutsü molungtetba tesayur tajung ka lir. Lai SATHRI, Senate of Serampore College & University nungi Dissertation "**Embodied Humanity garnering Ao Naga Traditional Resources Towards Constructing A Holistic Mission on Disability**" nung zülüa Doctor of Theology (D.Th) renema Mongsenyimti Laishir Telongjem aser Mongsenyimti Sensosanger ajak nem konang nüngsang tulu bentsür aruba tepela tulu asoshi la nem tenüngsang tetushi agütsür. Tsüngrem o bushiba nung mongin akümba ajanga ano la tenzükba mapa nunga takok tulu ngua inyaktettsü asen Laishirtemi yongyasetta sarasademtsüa atar. Tajung Tsüngremi na Pa tenzükba wadang asoshi tali moajangma.



Sd/-
Wb. S. Kümzük Lemtur
 Gen. Secretary, MLT

Sd/-
Wb. Likoknungsang Ozüküm
 President, MLT

KOSASANGER PUSU UNGMA

TSÜNGREMMUNG WASU MUNG

Anogo: August 2, 2022 Mapang: 10:00 am

Tesentepdak: Babu Tzübu Amphitheatre

TONGTI MONGSEMER:

Wb. Sharingain Longkumer
 Hon'ble Speaker,
 Nagaland Legislative Assembly.

Sentong Lenir: *Kv. Lmasenla Jamir*
 Sarasademtsü:
Rev. Mokoktoshi,
Asso. Pastor, USBCA

Pela-a agizükba:
Chairman, Ungma Village Council

Mongpu Ken:
Koasanger Pusu
i/c Wb. Imtidongba Jamir, Tatar
Wb. Temsuzenba Longkumer, Tatar

Kongshir Var-tsüngsang
 Tsüngremmung salem O:
Wb. Sharingain Longkumer,
Hon'ble Speaker, Nagaland Legislative Assembly

Wasudi arung
 Melepzüng O:
Secretary, Ungma Village Council

Tatem Sarasadem: *Wb. S. Tajung, Deacon, USBCA*

OFFICE OF THE

DIMAPUR YIMJENKIMONG SENSO TELONGJEM

Dimapur : Nagaland

TENÜNGSANG AGÜTSÜR

Wb. Katenchiba Ozüküm aser Wt. Ngangshitilla Tzüdi na jabaso **Dr. Aosanen Ozüküm-i Doctor of Philosophy**, onük "**Plant species diversity and community characteristics of forest ecosystem of Nagaland, North East India**", Mizoram University, Aizawal nungi takok tajung ngutetba atema tepela aser tenüngsang agütsür. Maneni tarutsü nunga takok tajung angutsü aser ne mapa ajak nung Tsüngremi moajang ta Yimjenkimong Senso Telongjemi sarasademtsür.

(Signature)
(T. RONGSEN TZÜDIR)
 President, DYST

(Signature)
(SENTIMSONG)
 Gen. Secretary, DYST

KONANG TETUSHI AGÜTSÜR

- 1) Mr. L. Chuba Pongen, U.T.I Dimapur (Moayimti Village)
- 2) Mr. Lemtongyanger Pongen, Ao Region (Chuchuyimlang Village)

Tsüngremi tena nem Aor aser Naga nung anitsü atema shisatsü aser tekolok tulu agüja Naga yimten asoshi meranga inyakba maangka tulu tena nem par government-i collective leader menden temaba nung ajungketa mendaktsüba asoshi kanga pelaba osang lemsateper. Asen Aor senso ajaki tena ajanga Naga lima temelenshi tajung bener arutsü sarasadema atadi.

Sd/-
S. Imtiwabang Jamir
 Dimapur

METETDAKTSÜR

Kakat 4 ya item tesemtem nung angutsü.

1. ABAM Arükhudongtem - Rs. 600
2. Ao Pioneers Taküm Otsü - Rs. 700/-
3. Ao Kin Dangi Yimsü Aruba - Rs, 550/-
4. Ao Lima Nüktzü - Rs. 500/-

Dimapur nung:
(1) O.M Bookstall, City Tower **(2)** Tir Yimiyim office, Super Market.
Mokokchung nung:
 1. Clark Literature House (MTBA Tenlaki downstairs).
Kohima nung:
 1. Wt. Tiarenla, PR Hill (Near Civil Supply office) (M. 9856330111).

U17 World Wrestling Championships: Suraj Vashisht-i gold angu



Chiteni/July 27, 2022 (Agencies): Suraj Vashisht ya India nung rongnungi küm 32 sülen Greco-Roman U17 World Championship gold medal anguba mezüngbuba asayar kümogo.

Arishi küm 16 tain asayar yagi 55kg weight class nung

anguba mezüngbuba asayar lir. Pappu Yadav-i 1990 küm iba asaya nung goal medal ngua liasü. U17 World Championships nung India nung asayar pongu tashi final tonga asaya saka kati danga takok mongutet.

"Ni asayaba weight class nung tajungtiba asayar akümtsü kü nükjidong lir. Hau senior world title ka akoktsü atema-nükjidong lir," ta pai United World Wrestling dang ashi.

"Pa indang stance kanga open lir anungji onoki pa dang pa teka kanga meparai asayatsü ashi," ta India coach Inderjeet Singh-i ashi.

"India nung wrestler tem par terre defence tashi mait anungji onoki pa dang zübazülema masayatsü ashi. Pai par terre situation karbo kanga junga defend sütetogo," ta paisa shisem.

IOA-i Victoria CWG nung Shooting, Wrestling bendenloktsü mepeshi

Chiteni/July 27, 2022 (Agencies): Indian Olympic Association (IOA) Acting tir, Anil Khanna, aser IOA treasurer, Anandeshwar Panday nati CGF Annual General Meeting amenba mapang Commonwealth Games Federation (CGF) tir, Dame Louise Martin den ajurutepogo, koba Grand Hotel Birmingham nung July 26 nü mena liasü.

IOA tenüng nung Khanna aser Panday nati CGF tir dang taruba Commonwealth Games nungbo wrestling aser shooting ya final sports programme nung Commonwealth Games indang final programme nung shooting aser wrestling na bendenloktsü atema Iba asayamung ya 2026 küm Australia kübok Victoria state nung asayatsü lir. Khanna aser Panday natisa, iba asayamung nung wrestling aser shooting bendenlokba ajanga iba asayamung koda mera taketba akümtsü iba indang Victoria 2026 Commonwealth Games, Organising Committee nem presentation ka agütsütsü mulunga lir, ta ashi. Iba den bendenloksema IOA tang Victoria 2026

Commonwealth Games indang final programme nung shooting aser wrestling na bendenloktsü atema lenmang yanglutsü asoshi iba asaya ana indang international federation tem den takok ngua sensaksemaktsütsü atema National Rifles Association of India (NRAI) aser Wrestling Federation of India (WFI) na den longjemer inyakdar.

Khanna aser Panday natisa IOA züngsemtem timba CGF Committees nung shilem agidaktsütsü atema mepeshia liasü.

India nung 2025 tetsür ODI World Cup ayonga asayatsü

New Delhi, Chiteni/July 27 (Agencies): 2025 küm tetsür 50-over World Cup India nung ayongzüka asayatsü. Mongolbarnü Birmingham nung ICC Annual Conference agiba mapang iba asayamung ayongzüka asayatsü atema BCCI nem temelaba agütsüogo.

Kasa anogo 2024 T20 World Cup asayatsü atema Bangladesh nem aser kasa asayamung 2026 küm ayongzüka asayatsü atema England nem temelaba agütsüogo. 2027 küm mezüngbuba T20 Champions Trophy Sri Lanka nung ayongzüka asayatsü.

Kasa mapang nung International Cricket Council (ICC)-i Cricket Russia indang membership agintsüogo. Mongolbarnü Birmingham nung tembangba ICC board senden nung iba telemtetba agia liasü. 2019 küm July ita nungi ICC züngsem ka asütsü asoshi latetja aliba inyakyim sülen manidakba atema Cricket Russia ya 2021 küm suspend süja liasü.

ICC-i ashiba agi, linük nung primary governing body ka ama ICC-i agizüktsü asoshi Cricket Russia ket nung status, structure, recognition aser membership maliasü. Russia ket nung lokti yimsü asütsü atema inyakyim tejangja ka mali, kong membership, AGMs aser voting rights amala onük ayimjemba temzüng ozüng mali aser iba den anticorruption, anti-doping aser ethics dak sendakba nunga temzüng ozüng tejangja ka lateta maliba densema lir. ICC sangdong ka ajanga ashiba agi, Cricket Russia-i iba tebilemtsü mebantettet aser parnok suspend sütsüba sülen parnok temsüa mali ta sayuogo.

Kasa mapang nung Ukraine-i ICC nung züngoksemtsü atema benokba sota lir aser linük nung cricket asaya tenzükba sülen asadangshitsü. ICC-i, Ukraine Cricket Federation nem iba inyakyim nung maneni teyari agütsütsü.

Maneni India nung nungtugu batsmen VVS Laxman, current player representative ama ICC Men's cricket committee nung taoba New Zealand captain Daniel Vettori den külemi züngoksemogo aser Roger Harper second past player representative ama committee nung züngoksemogo.

Board-isa, taruba ICC mendenbuba shimtsü atema inyakyim agizükogo, koba 2022 küm November ita agitsü. Election ya taoba mapang two-third majority nungdakba ama masü saka simple majority agi dang telemtetba agitsü.

Luis Suarez Uruguay Club Nacional nung adentsü



Chiteni/July 27, 2022 (Agencies): Luis Suarez free agent ka ama Uruguay club Nacional nungi asayatsü atema pre-contract ka yangluogo, ta taoba Liverpool aser Barcelona striker yagi Mongolbarnü metetdaksü.

Arishi küm 35 tain asayar ya pa indang professional career Nacional nung tenzük aser iba sülen 2006 küm Dutch club FC Groningen nung oa aden.

"Mezüngbuba nung tawa nenoki ni aser ozük kibong dang osang balala ajanga temeim sayuba atema kanga dang pelar. Iba ajanga onok mulungjang nung kongshio go aser tang onoki telemtetba ka agitsüsa kümogo," ta pai tweet asü.

"Nacional nungi tanaben

asayatsü atema maongka anguba ya melaluner aser onoki club den jeli tenanzüktepba ka yangluogo.

"Mapang tatsüka tsüngda ken o tembanga jembishinütsü aser ajaki agizüktsüsa tangatetep ka dangi arua taruba anogotem nung asenok ajurutepstü imlar," ta paisa shisem.

Suarez ya Uruguay nung asayatem rongnungi goal timtiba indaktsüba asayar lir. Pai 2007 küm nungi tang tashi nung asaya 132 nung goal 68 idakja lir.

Pa Ajax Amsterdam nungia asayaogo aser iba sülen Liverpool aser Barca nung asaya aser season tatembangpai Atletico Madrid tokja liasü.

Bayern Munich-i Mathys Tel alizüktsü mulunga agizükogo



Chiteni/July 27, 2022 (Agencies): Bayern Munich-i, arishi küm 17 tain Rennes nung forward Mathys Tel alizüktsü atema principle nungbo mulunga agizükogo. Coach Julian Nagelsmann-i Mathys yagi künübo season ka nung goal 40 tashi idaktsütettsü ta imlar.

Tel, shiba France under-18 team nungi asayaogo, pa taoba season Ligue 1 nung Rennes nungi substitute ama asaya kar nungbo shilem agiogo.

"Pai künübo season ka nung goal 40 tashi idaktsütettsü ta ni bilemer," ta United States nung Bayern pur pre-season tour mapa Nagelsmann-i ashi.

"Ajisüaka pai taküm goal 10 danga idaktsüra onok kanga pelatsü," ta paisa shisem.

Club anapronglai tang tashi nung pa transfer asüba indang osang officially sangdonga mali,

ajisüaka media osang balala ajanga ashiba agi, pa USD million 28.5 shi alang asütsü aser iba den ano tanga bonus tem adentsü.

"Alima nung asayar tajungtiba küma asayadaksütsü asoshi onoki lanur asayatem bushidar aser item asayatem rongnung pa ka asütsü akok," ta Nagelsmann-i ashi.

Bayern-i tang tashi nung Liverpool nungi Sadio Mane, Juventus nungi Dutch nung centre-back Matthijs de Ligt aser Ajax nungi Ryan Gravenberch aser Noussair Mazraoui na alizükogo.

Bayern Munich pur taruba hopta German Super Cup nung RB Leipzig den asayatsü aser iba sülen Bundesliga nung mezüngbuba asaya August 5 nü Eintracht Frankfurt den asayatsü.

BILEMDANGANG

"Tesüiba mapangtem temenen liaka tarutsü temerek lir."